

UPM sentiasa bantu pelajar OKU

SAUDARA PENGARANG,

MERUJUK kepada berita yang dilaporkan oleh *Utusan Malaysia* bertarikh 28 Ogos 2019 berkaitan rayuan bantuan kewangan oleh pelajar Universiti Putra Malaysia (UPM) yang merupakan orang kurang upaya (OKU), Wan Ahmad Amirul Adha Wan Mahzir, dia tidak perlu bimbang kerana kami sentiasa menitikberatkan aspek kebajikan dengan menyediakan pelbagai bentuk bantuan baik dari segi kewangan maupun fasiliti dan infrastruktur.

Wan Ahmad Amirul Adha adalah salah seorang daripada 11 pelajar OKU yang mendaftar. Oleh

yang demikian kami telah menyediakan pelbagai bentuk bantuan dalam memastikan kebajikan pelajar OKU terjamin. Bantuan tersebut diselaraskan oleh Bahagian Hal Ehwal Pelajar (BHEP), Pusat Pengurusan Wakaf, Zakat dan Endowmen (Wazan), fakulti dan kolej kediaman.

Antaranya bantuan kewangan yang disediakan kepada pelajar ialah agihan zakat mengikut kategori asnaf seperti fakir, miskin, mualaf, *ibnu sabil* dan *fisabilillah*. Bantuan zakat ini merangkumi yuran dan juga bantuan kecemasan. Di samping itu, UPM juga melalui BHEP menyediakan bantuan melalui Tabung Kebajikan Pelajar. UPM

juga menyediakan bantuan kebajikan dalam bentuk sumbangan makanan iaitu program *Mealplan* dan program *Free Meal*.

UPM juga ada skim Program Khidmat Pelajar (PKP) yang membolehkan pelajar bekerja dalam kampus dengan bayaran RM6 sejam. Bagi membantu golongan asnaf pula, UPM menyediakan pelbagai program pembangunan seperti kursus, latihan, kemahiran, bengkel dan motivasi agar mereka terus berdikari dan menamatkan pengajian dengan cemerlang.

PROFESOR DR. AZMAWANI

ABD. RAHMAN

Pengarah, Pejabat Strategi Korporat dan Komunikasi UPM